



Selasa, 09 Pebruari 2021
Ogen: Heber 11:13



"Perlajang Kap Kita"



Pernah sekalak Pandita ngerana man keluarga si paksana erceda ate, sabap Bapa i tengah jabuna idilo Dibata. Nina Pandita e, "Nggeluh enda labo ndekah, perban perlajang dengen kesilang i doni enda". Adi sinin kerna bahan renungenta sendah, Heber 11:13 b enda pe nina, terang-terang iakuina maka ia kalak perlajang dengen kesilang i doni enda. Kalak si perlajang arus mandiri ndalani kegeluhenna sabap sekalak-sekalak nge kita idiloNa i bas paksaNa. Lit pernah tertulis stiker bas sada angkot nina Bumi hanya tempat tinggal sementara, enda ngatakenca tuhu-tuhu kesilang kita i doni enda. Arusna, ndigan pe waktuna kita arus ersikap nadingken doni.

Adi ercakup kerna nadingken doni, melala kita mbiar, engkai? sabap kita nggeluh nggo terikat man doni enda, terikat kerna kekelengen man jabunta, terikat kerna sen ras kenikmaten si ibereken doni enda man banta. Pada hal, kerina e labo si baba bas kita nadingken doni enda. Megogo, morah ate, e ngenca sitadingken bas kita nadingken doni enda. Tapi ingetlah, doni enda Dibata kap si mada, labo lit hakta guna ngkuasai doni enda rasa lalap. Penungkunen man banta, kai nge banci kulakoken i bas aku tading sementara bas doni enda?. Penungkunen enda arus sikataken man pusuhta tep-tep wari, gelah si eteh lalap ndalanken bagi singena ate Dibata. Tiap wari? jawabenna ue, sabap la si eteh uga kegeluhenta wari si pepagi, Dibata ngenca metehsa ngasa ndigan kita erlajang i doni enda. Bagi lit sekalak bayak si lenga nggit mate, perban mbue kal erta-ertana lit me 5 panti sosialna si ibanna guna menampung anak-anak jalanan, anak yatim piatu ras sidebanna, tiap ibanna panti pasti ibanna pesta besar-besaran guna meresmikensa. Meriah kal ukurna, mehaga kapna bana, sabap melala kalak mujiken ia. Emaka tiap tahun ertambah-tambah rusur panti sosialna. Seh i bas sada paksa, mate me ia. Paksa ia idilo Dibata, dahina me Malekat i surga, emaka sungkunna : " o malekat, engkai maka aku lampas kal idilo Dibata, padahal melala panti sosial kuban." Jabab malekat bana : " tuhu mbue panti sosialndu, tapi mbue ka isia-siakenndu senndu guna erban pesta besar gelah ipandang kalak kam mehaga.



Ersikap ras gejakpenlah... situhuna perlajang dengen kesilang kita i doni enda.